

## Seetaler Verbandsturnfest Hochdorf 2018

Logbuch Sereina

### Freitag 15.06.2018

16:30 Uhr: Gymnastik-Tenue, Nagelschuhe, Schlafsack, Haarspray, Unterhosen... Guet ich glaub ich han alles ipackt! OH gott s isch scho halbi gsi und ich ha nanig emal de Trainer agleit. Ähm, welles Libli hämmer etz gseit leged mer a für d Reis? Und sölli etz wüerkli d Trainerhose alege?

16:50 Uhr: Isch ja klar gsi das es au das Jahr nöd pünktlich klappet. Debi hani mer sonen guete Ziiitplan zrächtgleit. Aber gottseidank händ all andere au d Trainerhose a, susch hetti mi dänn chli allei gfühlt mit mim Fuessballclub-Feeling.

17:00 Uhr: Läck ich froi mich ja uf das Turnfäscht... vorallem uf die noi GK. Oh Gott di noi GK! Ich weiss ja nöd öbs guet chunnt, aber ich tuen etz äfach so we wänni voll positiv igstellt wär, s wird ja scho schief ga...

18:45 Uhr: Hetti etz au en Döner selle hole da a dem chline komische Bahnhof in Länzburg, wo niemer gnau weiss wieso mer da dure gfare sind? Ah egal, han ja zmittag gässe, de wird scho hebe.

21:00 Uhr: Meine Güte, äntli hämmer ois mal igrichtet. Scho krass wie lang das die immer händ, bis all wüssed wo ane das wännd. Janu, stress hämmer ja nöd, obwohl de mitem Hunger wer dänn scho langsam es Thema...

22:30 Uhr: Läck händ mer die Chicken Nuggets guet tue, aber d Poulet flügeli wo de Simi gha hät, händ au fein usgseh. Jetzt bini aber parat zum da mal s Fäschtzält z beguetachte, ich ghöre scho d Musig...

### Samstag 16.06.2018

06:00 Uhr: Wiiiiisooooo? Zum Glück hämmer geschter nur eis Bier trunke (die meischte), suscht wer de Lidstrich dänn aso hüt morge sicher nöd so guet usecho. Die schminkerei isch ja schön aber so früe am morge bini nöd so Fan. Ah shit, fasch is Aug... was isch au für Ziiit? Ohoh etz mueni aber chli zackig...

08:00 Uhr: Ah lässig, zmorge... ah doch nöd so lässig die Gaggo-Milch isch ja richtig grusig. Chani dänn gar nöd bruche so churz vorem Wettkampf, isch mer ja vor luuter nervösi scho schlächt. Issi halt s gipfeli...

08:45 Uhr: So de Hochsprung isch dure, bravo für mich säkber, wieder mal e gloorrichi Niederlag igsamlet. Tja, d höchstleichtig vo einst, chamer nöd immer an Tag lege. Ich Konzentrier mich etz lieber uf die essentielle Sache....

09:55 Uhr: Yäss, da ischs ja wieder, das Gefühl wämmer e super leichtig bracht hät. Gimme Five, gimme Five, ja au du, mir sind super gsi, bin stolz uf oisi Stufearre-Gruppe...

11:15 Uhr: Okay Speer und Wiitsprung, gaht mi gad nüt aa. Aber s Gym training wo jetzt dänn gad stattfindet... Mal luege was mer alles na chan verbessere vorem Uftritt. Wow, im SSB hämmer es 8.40, nöd schlächt, das hämmer ois verdient!

12:05 Uhr: Jesses Mari, nur fehler hani turnt, obwohl, eigentlich ischs nur eimal bizli e falschi handbewegig gsi, das merkt doch niemert. Aso moll ganz guet hämmer turnet bi de Gym, nei was au, super simmer gsi!

13:45 Uhr: Mir händs gschafft! D'GK isch verbi und fasch all sind det gstande wos hettet sölle, momoll ich muen säge, ich bi stolz uf ois. Und dänn na die Nachricht vode Gym Note 9.12. de füdlublutti Wahnsinn!

14:00 Uhr: Bier, Bier, Bier... Was mer chan au Wasser trinke wämmer durst hät? Ich wett etz astosse und fiire das mer sone gueti leistung vollbracht händ!

17:30 Uhr: Hey das ässe isch dänn guet gsi! Etz bini sicher parat zum di ganz Nacht doretanze...

23:10 Uhr: Ui Näi, wo isch mis Portemonaie???? Schnäll am Paps alüte, de hockt no det wonis z letscht gha han ..... Phuuu, zum Glück ischs na under dem Tisch gläge... Danke Paps...

### **Sonntag 17.06.2018**

08:20 Uhr: Läck sind mir fröh is Bett, High Five to myself, Bravo! Ich glaub ich bin parat für de Zmorge, gits de ächt da au I sonere lange hellgrüne Fläsche wo schön abeküehlt isch?

10:15 Uhr: Zämebräche! Ähm wo sell ich jetzt gnau hälfe? Ich nimm mal die Blache da, oder lieber de Iseträger?

12:00 Uhr: Judihui, Schlussfiir! Meinsch die froied sich zum da mitmache? Oder händ die geschter ächt au na chli Party gmacht? Hmm... Oh, Andri, Ja sehr gern nimi au na es schlückli Wiisswii...

13:40 Uhr: We are the Partyshaker lalalalalala, Let's Party tonight... Yeah so cool, alli müend die Musig mitlose, chum Noemi, machemer nochli lüüter... und chum machemer doch na e Instastory...

16:15 Uhr: Hä was Usstige? Simmer scho in Winti? Näi, heigah, ich doch nöd...